

অষ্টম দার্স

الدرس الثامن

‘লা-ইলাহা ইল্লাল্লাহ’র শর্তগুলি

تابع شروط لا إله إلا الله

৬। ইখলাসঃ বান্দা নিয়ত তথা সংকল্পকে শির্কের সমস্ত পঙ্কিলতা থেকে মুক্ত রেখে স্বীয় আমলকে স্বচ্ছ রাখবে। সুতরাং তার সমস্ত কাজ ও কথা একমাত্র আল্লাহর সন্তুষ্টি বিধানের নিমিত্তে হবে। তাতে লোক দেখানোর উদ্দেশ্য বা খ্যাতি অর্জনের অভিলাষ অথবা কোন লাভের আকাঙ্ক্ষা কিংবা ব্যক্তিস্বার্থ সিদ্ধ করার সাধ অথবা প্রকাশ্য বা গোপনীয় কোন প্রবৃত্তির সিদ্ধি, আল্লাহর হেদায়াতকে উপেক্ষা করে কোন ব্যক্তি, মাযহাব বা দলের অত্যধিক ভালবাসার বশবর্তী হয়ে আমল করার প্রবণতা থাকতে পারে না। বরঞ্চ সকল কাজ আল্লাহর সন্তুষ্টি বিধান এবং পারলৌকিক উদ্দেশ্য অর্জনের জন্য হতে হবে। কোন মানুষের বিনিময় প্রদান বা কৃতজ্ঞতা পাওয়ার প্রতি ভ্রূক্ষেপও করবে না। মহান আল্লাহ বলেন, “সাবধান! বিশুদ্ধ আনুগত্য একমাত্র আল্লাহরই হক।” (সূরা যুমারঃ৩) তিনি আরো বলেন, “আর তাদেরকে এটা ব্যতীত কোন নির্দেশ দেওয়া হয়নি যে, তারা আল্লাহর ইবাদত করবে, নিজেদের দ্বীনকে একমাত্র তাঁরই জন্য খালিস করবে।” বুখারী ও মুসলিম শরীফের হাদীসে ইতবান-ﷺ-বর্ণিত হয়েছে, রাসূল-ﷺ-বলেছেন, “যে ব্যক্তি আল্লাহর সন্তুষ্টি বিধানের জন্য ‘লা-ইলাহা ইল্লাল্লাহ’ বলে, আল্লাহ তাকে জাহান্নামের উপর হরাম করে দেন।”

৭। ভালবাসাঃ এ মহান কালেমা ও তার নির্দেশ ও দাবীর প্রতি প্রগাঢ় ভালবাসা থাকতে হবে। ফলে আল্লাহ ও তাঁর রাসূলকে ভালবাসবে এবং এ ভালবাসাকে পৃথিবীর সকল ভালবাসার উপর প্রাধান্য দিবে। ভালবাসার শর্তসমূহ ও করণীয় বিষয়গুলো পালন করবে। তাই আল্লাহকে ভক্তি, শ্রদ্ধা, ভীতি ও আশা সহকারে ভালবাসবে। স্থান, সময়-কাল, ব্যক্তিবর্গ এবং কথা ও কর্মের মধ্যে আল্লাহ যা ভালবাসেন, তা তাকেও ভালবাসতে হবে। যেমন মক্কা, মদীনা ও সমূহ মসজিদ। সময় ও কালের মধ্যে যেমন, রমযান ও জিলহজ্জ মাসের প্রথম ১০ দিন। ব্যক্তিবর্গের মধ্যে যেমন, আশ্বিয়া ও রাসূলগণ, ফেরেশতা, শহীদ ও সৎলোকগণ। কাজ-কর্মের মধ্যে যেমন, নামায, যাকাত, রোযা ও হজ্জ। কথার মধ্যে যেমন, যিকর, কুরআন তেলাওয়াত ইত্যাদি। এটাও ভালবাসার পরিচয় যে, আল্লাহর দৃষ্টিতে প্রিয় বস্তুগুলোকে স্বীয় প্রিয় বস্তু ও ইচ্ছার উপর প্রাধান্য দিবে। আল্লাহ যা অপছন্দ করেন, সেও তা অপছন্দ করবে। কাজেই কুফরী, পাপাচার ও অবাধ্যতা ইত্যাদিকে মনে প্রাণে ঘৃণা করবে। মহান আল্লাহ বলেন,

﴿ يَا أَيُّهَا الَّذِينَ آمَنُوا مَنْ يَرْتَدَّ مِنْكُمْ عَنْ دِينِهِ فَسَوْفَ يَأْتِي اللَّهَ بِقَوْمٍ حُبُّهُمْ وَحُبُّونَهُ أَدْلَةٌ عَلَى الْمُؤْمِنِينَ أَعْرَءَ

عَلَى الْكَافِرِينَ يَجَاهِدُونَ فِي سَبِيلِ اللَّهِ وَلَا يَخَافُونَ لَوْمَةَ لَائِمٍ ﴾ ﴿المائدة: ৫৪﴾

“হে ঈমানদারগণ! তোমাদের মধ্যে কেউ ধর্ম হতে ফিরে গেলে আল্লাহ এমন এক সম্প্রদায় আনয়ন করবেন যাদেরকে তিনি ভালবাসবেন ও যারা তাঁকে ভালবাসবে, তারা হবে মু’মিনদের প্রতি কোমল ও কাফেরদের প্রতি কঠোর। তারা আল্লাহর পথে জিহাদ করবে এবং কোন নিন্দুকের নিন্দায় ভয় করবে না।” (সূরা মায়দা ৫৪)